

扁鵲心書

		一	二	三	漢書門
		二	三	四	
一	二	三	四	五	
冊	架	函	號	類	

內閣文庫	
番號	漢 12524
冊數	2 ( 1 )
函號	300 206

醫林指月七

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale

G Y M

© Kodak, 2007 TM: Kodak



扁鵲心書目錄

卷首

序

青辭

進表

卷上

當明經絡

須識扶陽

住世之法

大病宜灸

三世扁鵲

時醫三錯

忌用轉下

禁戒寒涼

要知緩急

五等虛實



黃帝灸法

扁鵲灸法

附竇材灸法

卷中

扁鵲心書 目錄



傷寒 傷寒四經見證

太陽見證 陽明見證 太陰見證

少陰見證 傷風傷寒 挾食冷物

中濕 陰毒 老人傷寒

陰陽換氣 傷寒譫語 傷寒衄血

勞復 汗後大便下赤水或膿血

午後發噫 肺傷寒 疽瘡 喉痺

虛勞 中風 癘風 風狂

口眼喎斜 破傷風 洗頭風 牙槽風

水腫 膨脹 暴注 休息痢

內傷 霍亂 暑月傷食泄瀉

痢疾 傷脾發潮熱

嘔吐反胃 痞悶 中暑

暑月脾燥疾 兩脇連心痛

消渴 着惱病 頭暈 厥證

氣脫 死脈見 腰痛

中風人氣虛中滿 老人兩脇痛

疝氣 吞酸 脾瘡 胃瘡

邪祟 怔忡 心痛 痺病

神癡病 下注病 脚氣 足痿

黃疸 黑疸 便閉 溺血

淋證 腸癖下血

卷下

陰莖出膿 腸癰 腸痔 膏肓病

噎病 咳嗽 咳噎 失血

腎厥 脾勞 腎勞 頭痛

眼病 夢泄 奔豚 肺腸痛

骨縮 手顫 老人便滑

老人口乾氣喘 耳聾 氣癭

三蟲 蠱毒 癩證 癩癧

婦人 子嗣 血崩 帶下

乳癰 胎逆 午後潮熱

臍中及下部出膿水 婦人卒厥

產後虛勞 小兒 驚風

斑疹即痘子 小兒午後潮熱 吐瀉

面目浮脹 咳嗽 溏瀉 腹脹

痢疾 水瀉 胎寒腹痛 下血

牙疳 螻蛄癩 禿瘡

水沫瘡 週身穴道

神方

金液丹 保命延壽丹 大丹

中丹 三黃丹 四神丹 五福丹

紫金丹 全真丹 來復丹 草神丹

薑附丹 霹靂湯 救生湯 鍾乳粉

萆澄茄散 半硫丸 滲濕湯

生薑半夏湯 附子半夏湯

平胃散 太白丹 鹿茸丸

黃藥子散 八風湯 八風丹 換骨丹

三五七散 蜜犀丸 白龍丸 華蓋散

祛風散 當歸柴胡湯 大通散

知母黃芩湯 當歸芍藥湯

四順散 知母散 木附湯 截瘡丹

良薑理中湯 建中湯 二聖散

八仙丸 厚腸丸 阿膠丸 桃花丸

如聖餅 珍珠散 少陽丹 中和湯

還睛丹 蜜蒙花散 撥雲散 洗肝散

補肝丸 文蛤散 一醉膏 睡聖散

薄荷散 碧雲湯 丁香丸 潤腸散

兔絲子丸 石膏丸 宣風丸 五膈散

撮氣散 麥煎散 煎紅丸 分氣丸

鎮心湯 遠志丸 定痛丸 阿膠散

定風散 安蟲散 檳榔丸 換骨散

胡麻散 消癭散 補宮丸 膠艾湯

地血散 大青膏 碧霞散 萬靈膏

育嬰丹 抑青餅 硃砂丸 醒脾丸

奪命丹 脫衣散 百花散

附金線重樓治證

服金液丹各種引藥

神治諸般風氣靈膏 汗斑神效方

扁鵲心書目錄終

扁鵲心書序

靈素為醫家正傳後世張仲景王叔和孫思邈孫兆初虞世朱肱皆不師內經惟採本草諸書各以已見

自成一家之技治小疾則可治大病不效矣王叔和朱肱和

可與仲景同列若云仲景不師內經誠觀傷寒金匱二書不本靈素之旨寧有如是精深之論乎至


皇甫士安巢元方王冰等雖學素問而不得方學之

傳亦依前六子方法而行此書從古至今未得通行

余業醫四世皆得此法之力而人世未深信故難梓

行余初學醫盡博六子之書以為醫之理盡矣然調

治小疾百發百中臨大病百無二三每恨已術之不



精也後遇關中老醫叩余所學笑曰汝學非是岐黃  
正派特小技爾祇能調小疴俟其自愈豈能起大病  
哉余卽從而師之三年師以法授我反覆參詳遂與  
內經合旨由茲問世百發百中再觀六子書真兒戲  
耳但師授固簡而當意欲梓行恐有未盡遂將追隨  
先師所歷之法與已四十餘稔之所治驗集成醫流  
正道以救萬世天枉後人得此苟能日夜勤求自能  
洞貫其理以見余言非謬至若賢良忠正孝子仁人  
再爲廣布俾天下後世上可以救君親下可以濟斯  
民余因恐遭天譴不敢自私刊刻流傳願仁者勿拘

成見而屑視之斯幸矣宋紹興十六年武翼郎前開  
州巡檢竇材謹序細觀此敘前後語意不相聯屬似非通人之語疑是後人僞作

### 奏玉帝青詞

維大宋紹興十六年丙寅月武翼郎臣竇材奏啟  
玉皇上帝玉陛下臣聞上天好生而惡死下民畏死  
而貪生上天雖云惡殺但示勸懲于下民非其人而  
殺之者有之下民雖曰貪生但歸生死于天命而致  
枉死者有之皇天憫下民之疾苦故假神農黃帝岐  
伯雷公扁鵲俞跗等以立醫教救人災病歷世綿遠  
屢遭兵火其神書散亡僅存者靈樞素問而已雖不

盡傳宗派是亦能救人疾苦保人性命但少洞徹藏

府剝腸滌髓之神耳果能參悟靈素自然洞見藏府

而用之神惜乎此書無傳諒亦不過一技術之妙豈

如靈素之貫天人晰隱顯大無不包細無不入為萬

世理道之神書後世仲景採內經外感風寒之旨附

以已見定立方法及採雜證七十餘條集為傷寒金

匱後之學者咸遵守莫敢移易殊不知傷寒既有

證內經自然該載何必牽扯種種雜病以為傷寒誤

人不少果能遵循仲景之法豈有誤人惟後學不明

名遺訛後世將為仲景之功臣實為仲景嗣後叔和

思邈又附益之障蔽聖經遺訛後世且經云傷寒為

病身熱熱雖甚不死論中風曰中五藏俞穴則為偏

風論水脹曰因氣為腫論厲風曰地之濕氣感則害

人皮肉筋脉如此言之其旨深其意廣後之人欲移

難就易妄為穿鑿且舉傷寒之證真邪相傳真氣盛

則病愈邪氣盛則病死陽證無死人之理陰證害人

甚速須加灸艾方保無虞仲景立許多承氣湯使後

人錯用致寒涼殺人于頃刻也三承氣湯惡能害人

之道而妄用承氣者臣因母病用仲景之法不效遂

成不救痛心疾首精究內經又得皇天默授經歷十

年方得靈驗凡一切大病小疾祇以此法觸類引伸



效如影響臣苦志五十餘年悟得救人秘法已十餘年矣向因薄宦奔走四方今年過不踰常慮身填溝壑其書失傳遂欲攷訂發梓伏望皇天后土特加慈憫保生民于仁壽之域俾其書萬世通流臣雖死無憾設有一言不實甘受天殃若此書果益于後世伏望神天護佑以廣其傳設此重誓以質上帝則其立不可謂偏于從熱而忽視之心切于天下後世可知學者以負先生一片救世婆心臣誠惶誠恐冒罪以聞

進醫書表

臣聞醫家正道內經為真內經言病最詳而無治病之法故黃帝又與岐伯撰出靈樞實為醫門所最急

者也嗣後秦越人依內經旨趣而演八十一難九鍼之說晉皇甫士安採靈樞之旨撰甲乙經十卷隋巢元方摘靈素緒餘註內經又撰病原三十卷唐王冰抉靈素之旨註內經撰天元玉歷已上諸子皆有著作悉師靈素去古法不遠而漢張仲景不師內經惟採本草湯液著金匱玉函十卷撰傷寒論十卷晉王叔和又贅其說唐孫思邈採本草藥性集成千金方三十卷玉函經五十卷和附仲景重重著述皆宗此意廢去針灸及丹附大藥盡用草木小藥盛行湯劑以之理小疾則生治大病則百無一活至千百世誤



死天下蒼生傷寒金匱之書辨六氣之環轉析神機

首尾貫通絲絲入扣至于在經俞而用針起陷下而

用灸并觀其自敘不可謂神于師內經者矣謂仲景不

師內經廢棄針灸不亦冤乎至若叔和思邈俱伏念

一代之明醫亦未宜深貶後學當細心辨之

臣河朔真定之寒士焉敢善善揭前輩之過但臣世

祖隸傳于醫學內舍相傳亦以千金仲景等方小試

果効用臨大證心竊有疑後得上天裨我此書更參

內經百發百中始信醫有回天之功也所謂大病者

一傷寒二陰疽內蝕三虛勞痰火四中風五水腫六

臟脹七脾泄暴注八尸厥九久痢十脾瘡十一喉痺

十二男女骨蒸勞熱十三小兒急慢驚風十四痘疹

黑斑縮陷至于胎前產後百十種必死大證世人莫

能救療束手待斃良可哀哉臣於此處消息五十餘

年乃見正道自古扁鵲俞跗倉公華佗皆此書也惜

不廣傳于後世臣今盡傳此法于人以救蒼生天橫

伏乞陛下大展聖裁憫諸末世將此書頒行天下試

之有驗臣死無憾若試之不效即置臣于法以彰誑

君之罪臣誠惶誠恐稽手頓首冒死以聞張師固不

孫亦不可闢夫先生之書固創出前賢然先生須根底

于素問靈樞致于仲景思邈更充之以先生之法

其于大疾沉疴自然遊刃有餘矣無如叔和世衰瀆祇

知耳食性喜寒涼畏惡針灸稍一談及俱搖頭咋舌

甘死不受是以先生之道難明而先生之法不能行

扁鵲小書

表

五

法先生倘以宿昔濟世仁心神感于予使予應心得  
手再為廣布以傳不朽諒先生在天之靈亦應許可  
古月老人  
胡珏謹識

扁鵲心書卷上

古神醫虛人扁鵲傳

宋太醫真定竇材重集

大清 錢塘胡珏參論

當明經絡

諺云學醫不知經絡開口動手便錯蓋經絡不明無  
以識病證之根源究陰陽之傳變如傷寒三陰三陽  
皆有部署百病十二經脈可定死生既講明其經絡  
然後用藥徑達其處方能奏效昔人望而知病者不  
過熟其經絡故也俗傳遇長桑君授以懷中藥飲以



上池之水能洞見藏府。此虛言耳。今人不明經絡，止讀藥性病機，故無能別病所在。漫將藥試，偶對稍愈，便爾居功，况亦未必全愈。若一不對，反生他病。此皆不知經絡故也。近世時醫失口言經絡部位，乃外科不明，何以知陰陽之交，接藏府之通，更疾病情，因從何審察。夫經絡為識病之要道，尚不肯講求焉。望其宗至，內經研究，傷寒識血氣之生始，或知榮衛之循行。陰陽根中，根外之理，不明神機，或出或入，之道不識。師徒授受，唯外之醫，指掌藥性，歌括以爲熟，此儘可通行。用藥誤人，全然不辨，或遇明醫，枝梧扯拽，更將時事俗情，亂其理，談常恐露出馬脚，唯一周旋承奉。彼明理人焉，肯作惡，只得挽回數言，以益其誤。如此時醫誠爲可恥。

須識扶陽

道家以消盡陰翳，煉就純陽，方得轉凡成聖。霞舉飛昇，故云：陽精若壯，千年壽；陰氣如強，必斃傷。又云：陰氣未消，終是死；陽精若在，必長生。故爲醫者，要知保扶陽氣爲本人。至晚年，陽氣衰，故手足不煖，下元虛憊，動作艱難。蓋人有一息氣在，則不死；氣者，陽所生也。故陽氣盡，必死。人于無病時，常灸關元氣海，命關中脘，更服保元丹、保命延壽丹，雖未得長生，亦可保百餘年壽矣。今人只是愛趨死路，動云我有火病，難上焦有人，即云中下積熱，及至委頓，亦不知變遷，或遇明眼之醫，畧啟扶陽之論，不覺彼此搖頭左右顧盼，不待書方而已。有不服之論，不覺彼此搖頭左右顧抱負施葢，附尚且難入而丹藥灼艾之說，斷乎其不

也  
可行

### 住世之法

紹興間劉武軍中步卒王超者本太原人後入重湖  
爲盜曾遇異人授以黃白住世之法年至九十精彩  
腴潤辛卯年間岳陽民家多受其害能日淫十女不  
衰後被擒臨刑監官問曰汝有異術信乎曰無也惟  
火力耳每夏秋之交卽灼關元千炷久久不畏寒暑  
累日不饑至今臍下一塊如火之煖豈不聞土成磚  
木成炭千年不朽皆火之力也死後刑官令剖其腹  
之煖處得一塊非肉非骨疑然如石卽艾火之効耳  
故素問云年四十陽氣衰而起居乏五十體重耳目  
不聰明矣六十陽氣大衰陰痿九竅不利上實下虛  
涕泣皆出矣夫人之真元乃一身之主宰真氣壯則  
人強真氣虛則人病真氣脫則人死保命之法灼艾  
第一丹藥第二附子第三人至三十可三年一灸臍  
下三百壯五十可二年一灸臍下三百壯六十可一  
年一灸臍下三百壯令人長生不老余五十時常灸  
關元五百壯卽服保命丹延壽丹漸至身體輕健羨  
進飲食六十三時因憂怒忽見死脉于左手寸部十  
九動而一止乃灸關元命門各五百壯五十日後死

脉不復見矣。每年常如此灸，遂得老年康健，乃為歌曰：一年辛苦惟三百灸，取闕元功力多。健體輕身無病患，彭篋壽算更如何。  
先生三法實為保命之要訣，然上策人多畏懼而不肯行。中策古今痛掃視為險途，若下策用之早而得其當，亦可十救其五。予遵行歷年，不無有效，有否効則人云：偶中否則讓謗蜂起。此非薑附之過，乃予熱腸之所招也。吾徒不可以此而退縮不前，視人之將死可救而莫救也。

大病宜灸

醫之治病用灸，如做飯需薪。今人不能治大病，良由不知鍼艾故也。世有百餘種大病，不用灸艾丹藥，如何救得性命，劫得病回，如傷寒、疽瘡、癰瘰、中風、腫脹、泄瀉、久痢、喉痺、小兒急慢驚風、痘疹、黑陷等證，若灸遲，真氣已脫，雖灸亦無用矣。若能早灸，自然陽氣不絕，性命堅牢。又世俗用灸，不過三五十壯，殊不知去小疾則愈，駐命根則難。故銅人鍼灸圖經云：凡大病宜灸臍下五百壯，補接真氣，卽此法也。若去風邪四肢小疾，不過三五七壯而已。仲景毀灸法云：火氣雖微，內攻有力，焦骨傷筋，血難復也。余觀亘古迄今，何嘗有灸傷筋骨而死者，彼蓋不知灸法之妙故爾。

論虛而至陷下，溫補無功，借冰臺以起陷下之陽耳。若仲景所言微數之脉，慎不可灸，脉而至于微矣。似有似無，則真陽已漓，又至于數矣。則真陰已竭，陰陽滴竭，灸亦無益。但有炎焰而無溫存，寧不焦骨傷筋。

而血難復。孫思邈早年亦毀灸法。逮晚年方信。乃曰。非毀灸也。火灸大有奇功。昔曹操患頭風。華陀針之。應手而愈。後陀死。復發。若于針處灸五十壯。永不復發。或曰。人之皮肉最嫩。五百之壯。豈不焦枯。皮肉乎。曰。否。已死之人。灸二三十壯。其肉便焦。無血榮養。故也。若真氣未脫之人。自然氣血流行。榮衛環繞。雖灸千壯。何焦爛之有哉。故治病必先別其死生。若真氣已脫。雖灸亦無用矣。惟是膏梁之人。不能忍耐痛楚。當服睡聖散。即昏不知痛。其睡聖散。余自用灸膝神效。放心服之。斷不誤人。以救已之心。推以救人。所謂見身說法。其言誠真。其心誠切。其論誠千古不磨。

之論無如天下之不信何

### 三世扁鵲

醫門得岐黃血脉者。扁鵲一人而已。扁鵲。黃帝時人。授黃帝太乙神明論。著五色脉診。三世病源。後淳于意。華陀所受者是也。第二扁鵲。戰國時人。姓秦。名越。人。齊內都人。採內經之書。撰八十一難。慨正法得傳者少。每以扁鵲自比。謂醫之正派。我獨得傳。乃扁鵲再出也。故自號扁鵲。第三扁鵲。大宋竇材是也。余學素問靈樞。得黃帝心法。革古今醫人大弊。保天下蒼生性命。常以扁鵲自任。非敢妄擬古人。蓋亦有所徵。

焉嘗因路過衢州野店見一婦人遍身浮腫露地而坐余曰何不在門內坐婦曰昨日蒙土地告我明日有扁鵲過此可求治病我故于此候之余曰汝若聽我我當救汝婦曰汝非醫人安能治病余曰我雖非醫然得扁鵲真傳有奇方故神預告汝遂與保命延壽丹十粒服之夜間小便約去二升五更覺飢二次又服十五粒點左命關穴灸二百壯五日後大便下白膿五七塊半月全安婦曰真扁鵲再生也予治數人患此症者浮腫喘急臥難着席漿粥俱不入矣既無丹藥亦不肯灸只用重劑薑附十餘貼而形體復舊飲食如常可知人能信用溫想扁鵲獨倚其才旁遊列國

為同道刺死華陀亦不傳其法為人譖死皆因秘而不發招人之忌耳余將心法盡傳于世凡我同心肯學正傳不妨亦以扁鵲自命可也舜何人哉予何人哉有為者亦若是

時醫三錯

凡陰疽及鬼邪着人或兩眼內障此三法皆出內經其瘡疽本于腎虛為陰所着寒邪滯經依附于骨故爛人筋害人性命其法必大補腎氣壯陽消陰土得陽氣自生肌肉則元氣周流不侵骨髓矣今則附入外科庸醫不知反用敗毒涼藥致元氣虛憊而死者多矣親見一婦人患伏兔陰疽形扁色白大如覆孟延一良山門瘍醫連用清火敗毒藥四劑不待



膿潰一瀉而死

鬼邪着人者皆由陰盛陽虛鬼能依附陰氣故易而成病若陽光盛者焉敢近之治法大補元氣加以育神則鬼邪自然離體病家不知專求符籙此等外道決無靈驗或假手庸醫認為燥火投以涼藥或清熱化痰致人枉死良可悲哉世俗于輕淺小疾皆事巫乎加之醫用寒涼故爾愈者不易

眼生內瘻由于脾腎兩虛陽光不振耳故光之短至于脾視物不明至乎腎法當溫補脾腎壯陽光以消陰翳則目明矣今則另立眼科以成一家之技只用

涼劑冰損元陽致脾腎虛衰而死殊不知一切病證皆有內經正法後人分立十三科妄名是以識見小者專習一科成一偏之見譬之大海中認一浮漚綜理未貫動即傷生悲哉予目觀京中來一太醫院官陳某自街能開瞽而火重者見效亦捷若本弱元虧者無不陰受其害斜橋一鹽販之妻一服膏半盞腹即痛其夫強之服盡大吐而斃其夫一時惶急從樓窺出街心哭叫陳太醫藥殺我婦百種辱罵累及祖先聞者無不寒心筆此以見寒涼誤人并信耳不信目之戒

忌用轉下

內經並無轉下之說止言發散又止言辛甘發散為陽辛溫之藥達表則自然汗散攻裏則自然開通先據

生之論謂辛甘發散為陽故表邪解而非若寒苦之

裏自和非辛甘能攻裏也後人當活看非若寒苦之

藥動人藏府泄人元氣也夫巴豆硝黃之類能直穿

藏府非大積大聚元氣壯實者不敢輕用今之庸醫

不問虛實動輒便行轉下以泄六府各氣轉生他證

重則脾胃漸衰不進飲食肌肉消瘦而死又俗云春

行夏補至秋時須服通行藥數劑以泄夏月積熱此

語甚訛俗醫慣將此數語印人耳目夫內經四時調

法何等圓活而思人執守一夫熱在內自然從五藏

說不肯精求靈素良可慨也

六府及大小便中泄出若以涼藥泄熱吾恐熱氣未

去一分而元氣已衰九分嘗觀服轉藥一劑則有五

七日飲食脾胃不能復舊况乎三焦爇熱方能腐熟

水穀若一刻無火則肌膚冰冷陽氣脫盡而死矣故

內經止有沉寒痼冷之論未有積熱純陽之說縱然

積熱為病一服轉下便可解救若陰寒為病則四肢

逆冷死在須臾古人立法若狂言妄語踰垣上屋諸

大熱證亦要論其大便如何數日不出者有燥屎也

方下之若大便如常即不可下狂言妄語踰垣上屋

此係無附之陽必死之證若治之早或有生者今人

于並無以上熱證而亦概用寒涼轉下必欲盡去其

熱吾不知將以何為生氣夫人身無熱則陽氣盡矣

此河間丹溪遺說後世業醫者不可以不察此弊也

禁戒寒涼

夫四百八病大約熱者居多寒者最少無怪乎河間  
 論火丹溪之補陰也但泥二子之書而不攷究內經  
 墮于偏頗害人特甚蓋熱病屬陽陽邪易散易治不  
 死冷病屬陰陰邪易伏故令人不覺久則變為虛寒  
 侵蝕藏府而死初起不覺之證最能害人往往况人  
 身之火多亦是當然天之六氣火居其二今之庸醫  
 執壯火食氣之說內經壯火食氣之說猶炎暑盛而  
 人之氣乏相火熾而真元傷非涼藥  
 之治亦非熱藥之謂馬元臺不察  
 此理妄為註釋遺說後學不淺溺于滋陰苦寒之

劑殊不知邪之中人元氣盛則能當之乃以涼藥冰  
 脫反泄元氣是助賊害主也夫涼藥不知害了多少  
 人若元氣稍虛者無不被涼藥冰敗而死脾胃有傷  
 焉望其生如人飲熱湯及炙燂之物從齒至髦斷無  
 損人之理內經言膏梁之變止發癰疽况膏梁發疽  
 者百無一二故知熱之養人時刻不可缺也若以冷  
 水飲人不須三日即為腹疼泄瀉脾虛胃敗矣故燧  
 人立法食必用火萬代蒼生得以活命俗醫大用涼  
 劑譬于飲人冷水陰害黎民良可慨也不見當今醫  
 家禍及子孫甚至滅門絕後皆學術不精之報也醫者

觀此切須猛省誤用涼藥之害真實不爽子見近代時醫常用溫平者或延一息終見陵替尚以寒涼攻伐天札人命者誠未見其有後也

要知緩急

夫病有淺深治有緩急體認病情而用藥緩急若急合當乃醫家第一要着若急病而用緩藥是養殺人也緩病而用急藥是逼殺人也庸醫遇病不能必其何名亦不能必其常用何藥槩以溫平試之若緩病尚可設遇大病則為誤不小故名養殺人若緩病投以急藥是欲速其效殊不知攻急則變生所謂逼殺人也二者之誤今世醫家比比瞻怯者蹈養殺之弊心粗者逞逼殺之害醫本生人乃為殺藪悲哉余觀京師名醫呂實者亦熟

此法但不早用惟先用溫平藥調治及至危篤方議灼艾丹附等事多不効乃曰此天命也殊不知救挽已遲藏氣敗絕雖靈丹妙藥無能為矣余親見彼治一傷寒第五日昏睡譫語六脈洪大以為胃中有熱以承氣下之四更即死矣六脈之大非洪也乃陽氣將脫故見此耳治以下藥更虛其陰則陽無所附而死速矣若先于臍下灸三百壯固住脾腎之氣內服保元丹斂陽丹飲薑附湯過三日自然汗出而愈余治一傷寒亦昏睡妄語六脈弦大余曰脈大而昏睡定非實熱乃脈隨氣奔也強為之治先生真仁人也強治之心余頗

有之第以人不我信且又碍于言訥而不用烈火灸

肯為究非真行仁術之人常以此自媿

關元穴初灸病人覺痛至七十壯遂昏睡不疼灸至

三鼓病人開眼思飲食令服薑附湯至三日後方得

元氣來復大汗而解今時始息成風灸法難行余嘗

有回陽之功無如世人不識俗醫痛搗良可慨也余思前證少陰病也發昏

譫語全似陽證若時投以承氣豈得不死故耳聾不

呻吟身生赤黑脛十指冷至脚面身重如山口多痰

唾時發躁熱者皆少陰證也仲景以耳聾係之少陽

譫語歸之陽明用柴胡承氣輩誤人不少夫但知少

陽脉循脇絡耳却不思耳竅屬腎以耳聾歸少陽此

仲景所未到之處也耳聾仲景作宗氣虛論未嘗歸

者多若陽明證中不過數條而已先生故加取駁未免有意索瘢

五等虛實

凡看病要審元氣虛實實者不藥自愈虛者即當服

藥灸關元穴以固性命若以溫平藥亦難取效淹延

時日漸成大病溫平之藥近世所尚旁人稱其穩當

錯投誤而又誤總由識虛病多般大畧分為五種有

平氣微虛甚虛將脫已脫之別平氣者邪氣與元氣

相等正可敵邪止以溫平藥調理緩緩而愈如補中

益氣小柴胡八物湯是也微虛者邪氣旺正氣不能

敵之須服辛溫散邪之藥當補助元氣使邪氣易伏  
宜葦澄茄散全真丹來復丹理中丸薑附湯之類是  
也甚虛者元氣大衰則成大病須用辛熱之藥厚味  
之劑大助元陽不暇攻病也經云形不足者溫之以  
氣精不足者補之以味即官桂附子鹿茸河車之類  
是也將脫者元氣將脫也尚有絲毫元氣未盡惟六  
脈尚有些小胃氣命若懸絲生死立待此際非尋常  
藥餌所能救須灸氣海丹田關元各三百壯固其脾  
腎夫脾為五藏之母腎為一身之根故傷寒必診太  
谿冲陽二脈者即脾腎根本之脈也此脈若存則

不死故尚可灸內服保元丹獨骸大丹保命延壽丹

或可保其性命單顧脾腎乃先生學力大有根柢之論蓋腎為先天之原脾為後天之本

資生資始莫不由茲故病雖甚而二若已脫則真氣

已漓脈無胃氣雖灸千壯亦無用矣此五種證當于平時細心探討

自然隨機應變不致差訛近世之醫多尚寒涼崇行  
尅伐致使平氣變虛虛證變脫及至三焦失運神氣  
收常出入道乖升降機息而猶執邪氣未盡火  
熱未除之說朝涼暮削不死不休良可悲痛

黃帝灸法

男婦虛勞灸臍下三百壯

男婦水腫灸臍下五百壯

陰疽骨蝕灸臍下三百壯

久患脾瘧灸命關五百壯

肺傷寒灸臍下三百壯

氣厥尸厥灸中脘五百壯

纏喉風灸臍下三百壯

黃黑疽灸命關二百壯

急慢驚風灸中脘四百壯

老人二便不禁灸臍下三百壯

老人氣喘灸臍下三百壯

久患腳氣灸湧泉穴五十壯

產後血暈灸中脘五十壯

暑月腹痛灸臍下三十壯

鬼邪着人灸巨闕五十壯臍下三百壯

婦人臍下或下部出膿水灸臍下三百壯

婦人無故風搐發昏灸中脘五十壯

久患偃僂不伸灸臍俞一百壯

鬼魘着人昏悶灸前頂穴五十壯

婦人半產久則成虛癆水腫急灸臍下三百壯

死脉及惡脉見急灸臍下五百壯

婦人產後腹脹水腫灸命關百壯臍下三百壯

腎虛面黑色灸臍下五百壯

嘔吐不食灸中脘五十壯  
婦人產後熱不退恐漸成癆瘵急灸臍下三百壯

扁鵲灸法

命關二穴在脇下宛中舉臂取之對中脘向乳三角取之

此穴屬脾又名食竇穴能接脾藏真氣治三十六種脾病凡諸病困重尚有一毫真氣灸此穴二三百壯能保固不死一切大病屬脾者並皆治之蓋脾爲五藏之母後天之本屬土生長萬物者也若脾氣在雖病甚不至死此法試之極驗

腎俞二穴在十四椎兩旁各開一寸五分

凡一切大病于此灸二三百壯蓋腎爲一身之根蒂先天之真源本牢則不死又治中風失音手足不遂大風癱疾

三里二穴在膝眼下三寸脛骨外筋內宛中舉足取之

治兩目眈眈不能視遠及腰膝沉重行步乏力此證須灸中脘臍下待灸瘡發過方灸此穴以出熱氣自愈

承山二穴在腿肚下挺脚指取之



治脚氣重行步少力

湧泉二穴在足心宛宛中

治遠年脚氣腫痛或脚心連脛骨痛或下粗腿腫

沉重少力可灸此穴五十壯

腦空二穴在耳尖角上排三指盡處

治偏頭痛眼欲失明灸此穴七壯自愈

目明二穴在口面骨二瞳子上入髮際

治太陽連腦痛灸三十壯

腰膈二穴在脊骨二十一椎下

治久患風腰疼灸五十壯

前頂二穴在鼻上入髮際三寸五分

治巔頂痛兩眼失明

附寶材灸法 計五十條

一 中風半身不遂語言蹇澁乃腎氣虛損也灸關元

五百壯

一 傷寒少陰證六脉緩大昏睡自語身重如山或生

黑靨噫氣吐痰腹脹足指冷過節急灸關元三百

壯可保

一 傷寒太陰證身凉足冷過節六脉弦緊發黃紫斑

多吐涎沫發燥熱噫氣急灸關元命關各三百壯

傷寒惟此二證害人甚速。仲景只以舌乾口燥為少陰。腹滿自利為太陰。餘皆歸入陽證條中。故致害人。然此二證若不早灸關元以救腎氣。灸命關以固脾氣。則難保性命。蓋脾腎為人一身之根蒂。不可不蚤圖也。舌乾口燥乃少陰本熱之證。仲景景之堂者不能知。非神于仲景之法者不能見。火熱亢盛不用承制。則燎原之害熾而生化之機息。可不畏哉。設本熱假而標陰。伏誤用承氣。立見危亡矣。先生設法真保命全生之要。業醫之士切須審察不可鹵莽而行之也。○仲景蓋以氣化而用承氣若涉形藏別有治法不可混關。

一 腦疽發背諸般疔瘡惡毒須灸關元三百壯以保腎氣

一 急喉痺頤癰頰腫水穀不下此乃胃氣虛風寒客肺也灸天突穴五十壯。穴在結喉下四寸

一 虛勞咳嗽潮熱咯血吐血六脉弦緊此乃腎氣損而欲脫也急灸關元三百壯內服保元丹可保性命

命若服知柏歸地者立死蓋苦寒重損其陽也。虛而致六脉弦緊即是腎氣損脫乃今之醫治虛勞者脉至微細急疾尚用寒涼真視人如草芥也此種人不知作何結果

一 水腫膨脹小便不通氣喘不臥此乃脾氣大損也急灸命關二百壯以救脾氣再灸關元三百壯以扶腎水自運消矣

一脾泄注下乃脾腎氣損二三日能損人性命亦灸命關關元各二百壯

一休息痢下五色膿者乃脾氣損也半月間則損人性命亦灸命關關元各三百壯

一霍亂吐瀉乃冷物傷胃灸中脘五十壯若四支厥冷六脉微細者其陽欲脫也急灸關元三百壯

一瘧疾乃冷物積滯而成不過十日半月自愈若延綿不絕乃成脾瘧氣虛也久則元氣脫盡而死灸中脘及左命關各百壯

一黃疸眼目及遍身皆黃小便赤色乃冷物傷脾所致灸左命關一百壯忌服涼藥若兼黑疸乃房勞

傷腎再灸命關三百壯命關當作命門

一番胃食已即吐乃飲食失節脾氣損也灸命關三百壯

一尸厥不省人事又名氣厥灸中脘五十壯

一風狂妄語乃心氣不足為風邪客于包絡也先服睡聖散灸巨關穴七十壯灸瘡發過再灸三里五十壯

一脇痛不止乃飲食傷脾灸左命關一百壯

百壯關元三百壯

一肺寒胸膈脹時吐酸逆氣上攻食已作飽困倦無力口中如含冰雪此名冷勞又名膏肓病乃冷物傷肺反服涼藥損其肺氣灸中府二穴各二百壯

一咳嗽病因形寒飲冷水消肺氣灸天突穴五十壯

一久嗽不止灸口俞二穴各五十壯卽止若傷寒後或中年久嗽不止恐成虛癆當灸關元三百壯

一癘風因臥風濕地處受其毒氣中於五藏令人面目龐起如黑雲或徧身如錐刺或兩手頑麻灸五藏俞穴先灸肺俞次心俞脾俞再次肝俞腎俞各

五十壯周而復始病愈爲度

一暑月發燥熱乃冷物傷脾胃腎氣所致灸命關二百壯或心膈脹悶作疼灸左命關五十壯若作中暑服涼藥卽死矣

一中風病方書灸百會肩井曲池三里等穴多不効此非黃帝正法灸關元五百壯百發百中

一中風失音乃肺腎氣損金水不生灸關元五百壯

一腸癖下血久不止此飲食冷物損大腸氣也灸神闕穴三百壯

一虛勞人及老人與病後大便不通難服利藥灸神

關一百壯自通

一小便下血乃房事勞損腎氣灸關元二百壯

一砂石淋諸藥不効乃腎家虛火所凝也灸關元三

百壯

一上消病日飲水三五升乃心肺壅熱又喫冷物傷

肺腎之氣灸關元一百壯可以免死或春灸氣海

秋灸關元三百壯口生津液

一中消病多食而四肢羸瘦困倦無力乃脾胃腎虛

也當灸關元五百壯

一腰足不仁行步少力乃房勞損腎以致骨痿急灸

關元五百壯

一昏默不省人事飲食欲進不進或臥或不臥或行

或不行莫知病之所在乃思慮太過耗傷心血故

也灸巨關五十壯

一脾病致黑色痿黃飲食少進灸左命關五十壯或

兼鰲色乃損腎也再灸關元二百壯

一賊風入耳口眼歪斜隨左右灸地倉穴五十壯或

二七壯

一耳輪焦枯面色漸黑乃腎勞也灸關元五百壯

一中年以上之人口乾舌燥乃腎水不生津液也灸

關元三百壯若誤服涼藥必傷脾胃而死

一中年以上之人腰腿骨節作疼乃腎氣虛憊也風邪所乘之證灸關元三百壯若服辛溫除風之藥則腎水愈涸難救

一腿脣間發赤腫乃腎氣風邪着骨恐生附骨疽灸關元二百壯

一老人滑腸困重乃陽氣虛脫小便不禁灸神闕三百壯

一老人氣喘乃腎虛氣不歸海灸關元二百壯

一老人大便不禁乃脾腎氣衰灸左命關關元各二百壯

一兩眼昏黑欲成內障乃脾腎氣虛所致灸關元三百壯

一癩癧因憂鬱傷肝或食鼠涎之毒而成于瘡頭上灸三七壯以麻油潤百花膏塗之灸瘡發過愈

一破傷風牙關緊急項背強直灸關元穴百壯

一寒濕腰痛灸腰俞穴五十壯

一行路忽上膝及腿如錐乃風濕所襲于痛處灸三十壯

一脚氣少力或頑麻疼痛灸湧泉穴五十壯

一頑癬浸淫。或小兒禿瘡。皆汗出入水濕淫皮毛而致也。于生瘡處。隔三寸灸三壯。出黃水愈。

凡灸大人。艾炷須如蓮子底。闊三分。灸二十壯後。却減一分。務要緊實。若灸四肢及小兒。艾炷如蒼耳子大。灸頭面。艾炷如麥粒子大。其灰以鵝毛掃去。不可口吹。

如癲狂人不可灸。及膏梁人怕痛者。先服睡聖散。然後灸之一服。止可灸五十壯。醒後再服再灸。

扁鵲心書卷上終

扁鵲心書卷中

古神醫盧人扁鵲傳

宋太醫真定竇材重集

大清 錢塘胡珏參論

傷寒

傷寒六脉浮緊。呻吟不絕。足指溫者。陽也。忌服涼藥。恐變為陰。害人性命。至六日發煩躁。乃陰陽換氣。欲作汗也。服當歸。茯苓散。汗出而愈。

太陽緊大。或弦細。不呻吟。多睡。耳聾。足指冷。肢節痛。發黃。身生赤黑。靨時發噫氣。皆陰也。灸關元三百壯。

服金液丹薑附湯過十日半月出汗而愈若不早灸  
反與涼藥者死辨別陰陽不止于此然熟體此二條  
能偏行若貧家無力而遇難起之病不能備參藥勉  
告以灸能活命倘肯依從未必非仁術之一端子每  
見時疫盛行之際鄉販死者比戶心切憐之倘盡心  
力并合丹藥以濟之不特已身蒙福子孫亦必昌大  
若吐逆而心下痞灸中脘五十壯若微微發顫者欲  
作汗服薑附湯而愈若少年壯實之人傷寒至五六  
日發狂踰垣上屋胃中有積熱也服大通散輕者知  
母散亦愈

傷寒四經見證

傷寒祇有四經無少陽厥陰二經夫寒之中人如太

陽主皮毛故寒邪先客此經陽明主胃凡形寒飲冷  
則傷之太陰主脾凡飲食失節過食寒物則傷之少  
陰主腎寒水喜歸本經也故傷寒止有四經若少陽  
厥陰主肝膽如憂思喜怒方得傷之寒病最少如耳  
聾囊縮者少陰也寒熱口苦乃陽病也此四證俱不  
宜用寒涼藥也言無少陽厥陰二經非通論也時醫  
辨陰陽不審虛實動云少陽首尾小柴胡和解以為  
穩妥不知虛陽提越內陰愈甚變為躁擾不安胸膈  
痞悶口渴謔妄脈體弦急更云內熱已深輕則瀉心  
白虎重則陷胸承氣不至冰脫不已至若厥陰標陰  
本風中見火化證來錯雜  
人多不識誤死者多矣

太陽見證

扁鵲心書

三



太陽寒水內屬膀胱故脉來浮緊外證頭疼發熱腰脊強惟服平胃散至六七日出汗而愈蓋胃氣不虛傳徧經絡自愈也仲景以為陽證乃與涼藥隨經而解反攻出他病甚者變為陰證六脉沉細發厥而死急灸關元乃可復生如本經至六七日發戰者欲作解而陽氣少也服薑附湯出汗而愈仲景圓機活法論中救誤者甚多何嘗能誤人哉其誤人者乃後人誤用仲景法而誤之耳于仲景何尤

陽明見證

陽明燥金內屬于胃六脉浮緊而長外證目痛發熱手足溫呻吟不絕服當歸柴胡湯平胃散仲景反言

熱深厥亦深此誤也若果發昏厥兩目枯陷不能昇者急灸中脘五十壯漸漸省人事手足溫者生否則死仲景厥陰證中有厥熱多寡之論不過驗邪正之進退察陰陽之消長示人為治之活法無偏無倚之有

太陰見證

太陰濕土內屬于脾其脉弦緊外證不呻吟四支不痛身不甚熱時自汗自利手足冷多痰唾服保元丹薑附湯十日後汗出而愈此證溫治若早愈亦甚速稍不審察害人亦易又一證發黃生紫班咽乾燥噫氣者此名陰燥陰黃服鍾乳粉十日後汗出而愈庸醫或誤認陽證涼之即

死

少陰見證

少陰君火內屬于腎其脉弦大外證肢節不痛不呻  
 吟但好睡足指冷耳聾口乾多痰唾身生赤黑盛時  
 發噫氣在重如山煩躁不止急灸關元三百壯內服  
 保元丹薑附湯過十日汗出而愈若作陽證誤服涼  
 藥以致發昏譫語循衣摸牀吐血脉細乃真氣虛腎  
 水欲涸也仲景反曰急下之以救腎水此誤也真氣  
 既虛反用涼藥以攻其裏是促其死也急灸關元三  
 百壯可保無虞少陰本熱標寒而又不中見太陽本熱

緒變態百出令人接應不暇然只在初時體察真切  
 用灸用温亦非難事良由初着一錯貽誤到底害人  
 不少至若無本熱而又無中見之太陽一派陰寒必  
 死無疑或速灸關元重投丹附亦在于覺之早庶望  
 其生。少陰誤治而變諸敗逆證誠為費手先生之  
 論端屬形藏故尚温補仲景之論惟言氣化故至承  
 制然論中用温者多下者不過數條而已况標本氣  
 化今古難明非神于仲景之法者不能倘于急下證  
 而誤温殺人反掌急温證而誤下  
 冤沉海底嗟嗟醫之為道誠難矣

傷風傷寒

脉浮為風脉緊為寒仲景分為兩塗故有麻黃桂枝  
 之說此誤也然傷寒乃太陽本氣受傷不可大汗但  
 服薑附湯自愈不必穿鑿他求以為精也浮風緊寒  
 古人通論  
 解肌發表定法難磨仲景不可訾也至若緊而動急  
 或微或沉神志稍失其常形氣不能振作則先生之

法斷不可緩。○傷風輕淺之證，初起咽喉疼痛，鼻中  
火出，此風邪外傷毛腠，抑遏陽氣，故現此耳。醫者不  
明，誤用寒涼，馴致重大。

### 挾食冷物

脉沉為胃氣寒，緊為冷氣盛，滑則食不消，其證頭痛  
發熱，嘔吐心下痞，時或腹痛，服丁香丸來復丹，若冷  
物不消，葶澄茄散，胃虛者平胃散，理中丸。

### 中濕

三四月間，人感潮濕之氣，名曰濕病。或六七月大雨  
時行，恣飲冰水冷物，亦名中濕。則令人寒熱自汗，陽  
則脉緊，肢節痛，足指温，服朮附湯。陰則脉沉而緊，肢

節不痛，身涼自利，足指冷，服薑附湯。不可發汗，汗則

必發煩躁，虛汗不止，或發黃腫。若服涼藥，則泄瀉而

死。先生于此證，雖分陰陽而用附子，則一人于六  
七月之交，不辨是寒是濕，或陰或陽，動輒云暑，始  
用寒涼，及至發腫瀉泄，而猶云暑毒未  
清，又行攻下，不至醫殺不止，實可痛心。

### 陰毒

或腎虛人，或房事後，或胃發冷氣，即腹痛煩躁甚者，

囊縮昏悶而死，急灸關元一百壯，內服薑附湯，保元

丹可救一二。若遲則氣脫，雖灸亦無益矣。審證的確，  
即當速救。

不可因循  
致歸絕路

### 老人傷寒

切忌發汗及吐下。蓋元氣盛則邪不能為害。傳編經絡自愈。仲景不敢補。反攻邪氣。致正氣受傷。誤人多矣。凡遇此證。只用薑附湯。多服自然解散。元虛而受攻傷正何必老人仲景醫之聖者寧不知此

### 陰陽換氣

凡傷寒陽證欲作汗。陰證已加灸。真元欲復。與邪氣分爭。必發寒戰。鼻衄昏迷。牙關微緊。四肢微厥。乃陰陽換氣也。一二時辰。自然腋下汗出而愈。陰陽換氣謂戰汗須預告病家。令其不必驚駭。否則闔室蒼惶。讒言蜂起。彼時一劑誤投。遂有生死之判。

### 傷寒譫語

凡傷寒譫語屬少陰。仲景屬陽明。誤也。陽明內熱必發狂。今止譫語。故為少陰。仲景皆指神虛未嘗不屬少陰也。急灸關元三百壯。若灸後仍不止者死。

### 傷寒衄血

凡鼻衄不過一二盞者。氣欲和也。不汗而愈。若衄至升斗者。乃真氣脫也。針關元入三寸。留二十呼。血立止。再灸關元二百壯。服金液丹。不然恐成虛勞。中滿。當解當清當溫當補。審證施治。庶幾無誤。

### 勞復

傷寒瘥後。飲食起居勞動。則復發熱。其候頭痛身熱。

煩躁或腹疼脉浮而緊此勞復也服平胃散分氣丸汗出而愈若連服三四次不除者此元氣大虛故也灸中脘五十壯勞復證仲景數方用須斟酌第一須審邪氣之有無辨寒熱之多寡以施治則無誤矣

汗後大便下赤水或膿血

此乃胃中積熱未除或服丹附而致宜服黃連當歸芍藥湯下膿者如聖餅化積而愈經云熱雖甚不死若陰氣盛則殺人于頃刻戒之熱藥之過一涼可解涼藥之誤十熱難瘳又積熱易解而易治沉陰難愈而難明臨證之工大宜體認

汗後發噫

由于脾腎虛弱冷氣上奔也服薑附湯來復丹此證

發呢若噫證無死人之理觀後二案可見

治驗

一人傷寒至八日脉大而緊發黃生紫斑噫氣足指冷至脚面此太陰證也最重難治為灸命關五十壯關元二百壯服金液丹鍾乳粉四日汗出而愈

一人患傷寒至六日脉弦緊身發黃自汗亦太陰證也先服金液丹點命關穴病人不肯灸傷寒惟太陰少陰二證死人最速若不早灸雖服藥無效

不信至九日瀉血而死不聽良言往往至此及至

黃熱迫痛為排擠反用寒涼以下石至死衆口吹

何恤

一人病傷寒至六日微發黃一醫與茵陳湯次日

更深黃色徧身如梔子此太陰證誤服涼藥而致

肝木侮脾余為灸命關五十壯服金液丹而愈寒

發黃雖有陰陽之異然脾家陰濕而為陰黃者多不可不知

一人患傷寒初起即厥逆脈一息八九至諸醫以

為必死余曰乃陰毒也與薑附湯一盞至半夜汗

出而愈若以脈數為熱下涼藥必死無疑俗醫視此必以

為痰證禁服官料藥尚行焯刺縱飲冷水不致冰脫不已

### 肺傷寒

肺傷寒一證方書多不載誤人甚多與少陰證同但

不出汗而愈每發于正二臘月間亦頭疼肢節痛發

熱惡寒咳嗽脈緊與傷寒畧同但多咳嗽耳不宜汗

服薑附湯三日而愈若素虛之人邪氣深入則昏睡

譫語足指冷脈浮緊乃死證也急灸關元三百壯可

生不灸必死服涼藥亦死蓋非藥可療也肺傷寒之

認為重傷風非溫平誤事即寒涼殺人于無疑證畧

有分曉然不免因人檢點苟遇知已用之無疑應酬

通治不過薑甘桂辛而已設藥用薑附往往遭人謗毀

治驗

一人患肺傷寒頭痛發熱惡寒咳嗽肢節疼脉沉  
緊服華蓋散黃芪建中湯畧解至五日昏睡譫語  
四肢微厥乃腎氣虛也灸關元百壯服薑附湯始  
汗出愈此證與雍正六年自春徂夏時氣大同時  
俗皆禁服藥則有誤不知非藥誤人乃  
庸人不明此理妄投涼藥之  
誤耳苟具隻眼焉得有誤

疽瘡

有腰疽背疽腦疽腿疽雖因處以立名而其根則同  
方書多用苦寒敗毒之藥多致剝削元氣變為陰疽  
侵肌蝕骨潰爛而亡不知內經云脾腎氣虛寒氣客

于經絡血氣不通着而成疾若真氣不甚虛邪氣不  
得內陷則成癰蓋癰者壅也血氣壅滯故大而高起  
屬陽易治若真氣虛甚則毒邪內攻附貼筋骨則成  
疽蓋疽者阻也邪氣深而內爛阻人筋骨屬陰難治  
其始發也必憎寒壯熱急服救生湯五錢再服全好  
甚者即于痛處灸三五壯陰疽即三五  
壯亦不為過如痛者屬  
陽易治若不痛乃疽瘡也急服保元丹以固腎氣若  
用涼轉藥則陽變為陰或不進飲食而死急灸關元  
可生近世瘍醫祇記一十三味方不問邪之深淺感  
之重輕頂之起不起色之紅不紅不辨五美不  
審七惡藥用此方更加涼解即見純陰冷毒而猶云  
半陰半陽總以發散解毒為良法及至寒涼冰伏尚

云毒盛內攻或見神情躁擾終認火熱未清小證變  
大淺證變深若遇大證未有不受其害者世謂外科  
拙折腿醫亦不盡然人之無良亦或有之其餘實由  
學問未精識證不確陰陽錯亂虛實混淆變證之來  
全然不曉有似故意  
害人其實非本心也

治驗

一人病腦疽六日危篤不進飲食余曰年高腎虛  
邪氣滯經也令服救生湯卽刻減半夜間再進一  
服全安

一人忽患徧身拘急來日陰囊連莖腫大如斗六  
脉沉緊余曰此陰疽也幸未服解毒涼藥若服之  
則莖與畢丸必皆爛去而死急令服救生湯五錢

又一服全安

一老婦腦後作痛憎寒拘急余曰此欲發腦疽也

急服救生湯三服全愈

余治一婦新產深居密室頭面徧體生札馬疔外  
科與清火敗毒藥二劑立時消去其家甚喜次日  
胸中氣悶渴燥不已神氣異常至晚腹痛泄瀉身  
熱體倦嘔惡不食瘍醫云暑毒內攻更與連梔涼  
劑煎訖將進適余至診其脉空散無根一息七八  
至乃裏虛毒陷也卽以異功加薑附飲之次日瀉  
止神清食粥不嘔又一劑而札麻疔仍復發出亦  
不如前之痛苦矣夫札馬疔小疾耳涼解一誤尚  
變脫陷况大毒乎記此以爲瘍醫寒  
涼之戒精方脉者亦不可不明此理

凡一切癰疽發背疔瘡乳癰瘡毒無非寒邪滯經只  
以救生湯服之重者減半輕者全安百發百中



喉痺

此病由肺腎氣虛風寒客之令人頤頰粗腫咽喉閉塞湯藥不下死在須臾者急灌黃藥子散吐出惡涎而愈此病輕者治肺服薑附湯灸天突穴五十壯亦好重者服鍾乳粉灸關元穴亦服薑附湯

治驗

一人患喉痺痰氣上攻咽喉閉塞灸天突穴五十壯即可進粥服薑附湯一劑即愈此治肺也  
一人患喉痺頤頰粗腫粥藥不下四肢逆冷六脉沉細急灸關元穴二百壯四肢方暖六脉漸生但咽喉尚腫仍令服黃藥子散吐出稠痰一合乃愈此治腎也

一人患喉痺六脉細余為灸關元二百壯六脉漸生一醫曰此乃熱證復以火攻是抱薪救火也遂進涼藥一劑六脉復沉咽中更腫醫計窮用尖刀于腫處刺之出血一升而愈蓋此證忌用涼藥痰見寒則凝故用刀出其肺血而腫亦隨消也先生治肺

治腎之法千古卓見况咽喉之證風火為患十有二三肺腎虛寒十有八九喉科不明此理一味寒涼即有外邪亦致冰伏若元本虧損未有不閉悶致死者所以咽喉妙法第一開豁痰涎既湧自然通快然後審輕重以施治薑附灼艾誠為治本之法但人多畏之而不肯用耳然當危急時亦

不可避忌強為救治亦可得

生也至于刺法亦須知之

雍正四年咽喉證甚行友人之

痺次日即爛子診其兩寸無力

火動以七味丸作湯與服一劑

小緩鄰家施其延喉科視之彼

藥不知此乃陽明熱甚證火性

即腐潰豈可用溫補劑耶乃投

而神氣改常語溫錯亂甚至顛

復延子予診其脈亂而八九至

火石膏實為良劑今係無酸而

胃絡陷下而不能上通故心神

桂飲之甫一劑而神恬脈靜矣

虛勞

此病由七情六慾損傷脾腎早尚易治遲則難愈必用火灸方得回生若用溫平藥及黃芪建中鱉甲飲

之類皆無益于病反傷元氣其證始則困倦少食額

上時時汗出或自盜汗口乾咳嗽四肢常冷漸至咳

吐鮮血或咯血多痰蓋腎脈上貫肝膈入肺中腎既

虛損不能上榮于肺故有是病治法當同陰證治之

先于關元灸二百壯以固腎氣後服保命延壽丹或

鍾乳粉服三五兩其病減半一月全安若服知柏地

黃當歸之屬重傷脾腎是促其死也切忌房事然此

病須早灸遲則無益丹藥亦不受矣服之反發熱煩

乃真脫故也若童男女得此病乃胎秉怯弱宜終身

在家若出嫁犯房事再發必死

治驗

一人病咳嗽盜汗發熱困倦減食四肢逆冷六脉  
弦緊乃腎氣虛也先灸關元五百壯服保命延壽  
丹二十九鍾乳粉二錢間日服金液丹百丸一月  
全安

一人病咳嗽證脉與上條同但病人怕灸止服延  
壽丹五十粒金液丹百粒鍾乳粉二兩五日減可  
十日脉沉緩乃真氣復也仍服前藥一月全安蓋  
此病早治不灸亦可遲必加灸否則難治

一幼女病咳嗽發熱咯血減食先灸臍下百壯服  
延壽丹黃芪建中湯而愈戒其不可出嫁犯房事  
必死過四年而適人前病復作余曰此女胎稟素  
弱只宜固守終老不信余言破損天真元氣將脫  
不可救矣強余丹藥服之竟死

一人額上時時汗出乃腎氣虛也不治則成癆瘵  
先灸臍下百壯服金液丹而愈  
一人夜多虛汗亦腎氣虛也服全真丹黃芪建中  
湯而痊

一婦人產後虛汗不止乃脾腎虛也服金液丹全  
真丹當歸建中湯而愈凡童男女秉氣虛多汗者

亦同此治

一人每日四五遍出汗灸關元穴亦不止乃房事  
後飲冷傷脾氣復灸左命關百壯而愈

一婦人傷寒瘥後轉成虛勞乃前醫下冷藥損其  
元氣故也病人發熱咳嗽吐血少食為灸關元二

百壯服金液保命四神鍾乳粉一月全愈

脾腎者先後天之本與元也虛勞之病雖有五藏  
之殊其原皆由于脾腎受病而脾腎之治殊難見  
效不知其原皆由于脾腎受病而脾腎之治殊難見  
元本且充自然真水流行津液四布神精內守烟  
焔不生五藏無偏頗之虞水有交濟之益何難  
治之有哉奈何世人不察習用寒涼不敗不已間  
平之劑而已知先生之法者有幾人哉但恨起石

無真鍾乳多偽合丹救濟亦屬徒然惟有艾火庶  
可求全人又不肯耐疼忍痛應名數病此證之雙

愈者所以千百而無一二也予具熱腸動違庸俗

明知難起之疾勉投桂附十中亦起一二其終不

愈者不免多口之來予亦無庸置辨彼蒼者天諒

能默鑒予救世之衷也因畧舉治愈數人附記于

後以為吾黨型式仰知溫補之可以活人而不為

流俗所惑不因譏毀縮手也

友人沈蔭昌兄因患伏免疽膿血過多有傷元本

變為虛勞服滋陰劑過多喘急吐血飲食少進子

診之脈弦急有七八至面色純青喘咳氣急臥難

着席身熱汗出涎沫不收虛脫之證已悉見矣又

貧乏無力用參乃予建中重投芪桂一服而喘定

安眠涎沫與血俱減大半第病久而脾腎過傷胃

氣難復投桂附加參錢許月餘而痊

王在庭之室病虛勞十餘載喘促吐沫嘔血不食  
形體骨立諸醫束手延予診視見其平日之方皆  
滋陰潤肺温平之劑予曰以如是之病而乃用如  
是之藥自然日趨鬼趣焉望生機獨不思仲景云  
咳者則劇數吐涎沫以脾虛也又昔賢云腎家生

陽不能上交于肺則喘又云脾虛而肺失生化之  
原則喘今脾腎敗脫用藥如此焉望其生乃重投  
參茸薑附等二劑而喘定緣泄瀉更甚再加黃蘗  
十餘劑而病減十七又灸關元因畏痛只灸五十  
壯迄今十餘年而形體大健矣  
一壯中今十餘年而形體大健矣  
滋陰退熱藥月餘致面青脉急喘促吐血嘔沫日  
數升飲食不進二醫束手覆而不治予為重用參  
附十餘劑而安此非其本原受  
虧乃藥誤所致故收功易也

中風

此病皆因房事六慾七情所傷真氣虛為風邪所乘  
客于五藏之俞則為中風偏枯等證若中脾胃之俞  
則右手足不用中心肝之俞則左手足不用大抵能  
任用但少力麻痺者為輕能舉而不能使用者稍輕全  
不能舉動者最重邪氣入藏則廢九竅甚者卒中而  
死入府則壞四支或有可愈者治法先灸關元五百

壯五日便安次服保元丹一二斤以壯元氣再服八  
仙丹八風湯則終身不發若不灸臍下不服丹藥雖  
愈不過三五年再作必死然此證最忌汗吐下損其  
元氣必死大凡風脉浮而遲緩者生急疾者重一息  
八九至者死中風之證古方書雖有中藏中府中經  
脈之別然其要不過閉證與脫證而已  
閉證雖屬實而虛者不少或可用開關通竅行痰疎  
氣之劑關竅一開痰氣稍順急當密其形藏察其氣  
血而調治之更視其兼證之有無虛實之孰勝或補  
或瀉再佐以先生之法庶幾為效速而無痿廢難起  
之患矣至若脫證惟一子虛重劑參附或可保全然  
不若先生之丹艾為萬全也予見近時醫家脫證已

具三四而猶云有風有痰雖用參附而必佐以秦芫  
天麻膽星竹瀝冰陷疎散是誠不知緩急者也烏足  
與論醫道哉

治驗

一人病半身不遂先灸關元五百壯一日二服八  
仙丹五日一服換骨丹其夜覺患處汗出來日病  
減四分一月全愈再服延壽丹半斤保元丹一斤  
五十年病不作千金等方不灸關元不服丹藥惟  
以尋常藥治之雖愈難久

一人患左半身不遂六脉沉細無力余曰此必服  
峻利之藥損其真氣故脉沉細病者云前月服捉  
虎丹吐涎二升此後稍輕但未全愈耳余嘆曰中  
風本因元氣虛損今服吐劑反傷元氣目下雖減  
不數日再作不復救矣不十日果大反復求治于  
余雖服丹藥竟不能起

癘風

此證皆因暑月仰臥濕地或房勞後入水冒風而中  
其氣令人兩目壅腫雲頭斑起或肉中如針刺或麻  
痺不仁腫則如癰疽潰爛筋骨而死若中肺俞心俞  
名曰肺癘易治若中脾肝腎俞名曰脾肝腎癘難治  
世傳醫法皆無効驗黃帝正法先灸肺俞二穴各五

十壯次灸心俞次脾俞次肝俞次腎俞如此周而復始全愈為度內服胡麻散換骨丹各一料然平人止

灸亦愈若爛見筋骨者難治經云脈風成爲癘蓋風

風邪留于脈中淹纏不去而癘風成矣其間有傷營

傷衛之別傷營者營氣熱附其氣不清故使鼻柱壞

而色敗皮膚之傷與衛氣相犯其道不利故使肌肉

俞散于分肉之間與衛氣相犯其道不利故使肌肉

房勞或有傷○此證感天地毒癘濁惡之氣或大醉

血分則下體先見氣血俱受則上齊見更須分五

則脚底先痛或穿脾則遍身如癩心則雙目受損此

五藏之毒病之重者血死潰爛目癱筋死指甲脫落

不仁肉死割刺不痛血死潰爛目癱筋死指甲脫落

骨死鼻柱崩壞此五藏之傷病之至重者難治若至

更無及矣

治驗

一人面上黑腫左耳下起雲紫如盤蛇肌肉中如

刀刺手足不知痛詢其所以因同僚邀遊醉臥三

日覺左臂黑腫如蛇形服風藥漸減今又發余曰

非風也乃濕氣客五藏之俞穴前服風藥乃風勝

濕故當暫好然毒根未去令灸腎俞二穴各百壯

服換骨丹一料全愈面色光潤如故

一人徧身赤腫如錐刺余曰汝病易治令灸心俞

肺俞四穴各一百壯服胡麻散二料而愈但手足

微不隨復灸前穴五十壯又服胡麻散二料全愈

一人病癘證鬚眉盡落面目赤腫手足悉成瘡痍  
令灸肺俞心俞四穴各十壯服換骨丹一料二月  
全愈鬚眉更生

風狂

此病由于心血不足又七情六慾損傷包絡或風邪  
客之故發風狂言語無倫持刀上屋治法先灌睡聖  
散灸巨闕二三十壯又灸心俞二穴各五壯內服鎮  
心丹定志丸此證有陽明脈盛而為熱狂者清涼可  
愈也有暴折而難決為怒狂者奪其食  
則已治之以生鐵落飲二證皆狂之實者也然虛證  
常多不可誤治設一差訛害人反掌有心血不足而  
病者有腎水虧損而病者有神志俱不足而病者有  
因驚恐而病者有因妄想而病者是皆虛證體察而

治無  
悖矣

治驗

一人得風狂已五年時發時止百法不効余為灌  
睡聖散三錢先灸巨闕五十壯醒時再服又灸心  
俞五十壯服鎮心丹一料余曰病患已久須大發  
一回方愈後果大發一日全好  
一婦人產後得此證亦如前灸服薑附湯而愈

口眼喎斜

此因賊風入舍于陽明之經其脈挾口環唇遇風氣  
則經脈牽急又風入手太陽經亦有此證治法當灸



地倉穴二十壯。艾炷如小麥粒大。左囑灸，左右囑灸。右後服八風散，三五七散，一月全安。此證非中風兼證之口眼喎斜，乃身無他苦而單現此者是賊風之客也。然有筋脈之異傷筋則痛傷脈則無痛，稍有差別治法相同。

破傷風

凡瘡口或金刃破處，宜先貼膏藥以禦風，不然致風氣入內，則成破傷風。此證最急，須早治，遲則不救。若初得此時，風客太陽經，令人牙關緊急，四肢反張，項背強直，急服金華散，連進二三服，汗出即愈。若救遲，則危篤，額上自汗，速灸關元三百壯，可保。若真氣脫，雖灸無用矣。此證所患甚微，為害甚大，雖一毛孔之傷，有關性命之急，一人因拔髭一莖，忽

熱腫起不食，有友人詢余，余曰：此破傷風也，速灸而妙。瘍醫認作鬚疔，治以寒涼，不數日發瘥而死。

洗頭風

凡人沐頭後，或犯房事，或當風取涼，致賊風客入太陽經，或風府穴令人卒仆，口牙皆緊，四支反張，急服薑附湯，甚者灸石門穴三十壯。此證若無房事之傷，焉至于此，慎之慎之。

牙槽風

凡牙齒以刀針挑之，致牙根空露，為風邪所乘，令人齒齲，急者潰爛於頃刻，急服薑附湯，甚者灸石門穴。腎主骨，齒乃骨之餘，破傷宜露風邪，直襲腎經，致潰爛于俄頃，舍薑附而用寒涼，為變可勝道哉。

水腫

痛鵝心書 卷中 醫

此證由脾胃素弱為飲食冷物所傷或因病服攻剋  
涼藥損傷脾氣致不能通行水道故流入四肢百骸  
令人徧身浮腫小便反澀大便反泄此病最重世醫  
皆用利水消腫之藥乃速其斃也治法先灸命關二  
百壯服延壽丹金液丹或草神丹甚者薑附湯五七  
日病減小便長大便實或潤能飲食為効惟喫白粥  
一月後喫餅麪無妨須常服金液丹來復丹永瘥若  
曾服芫花大戟通利之藥損其元氣或元氣已脫則  
不可治雖灸亦無用矣若灸後瘡中出水或雖服丹  
藥而小便不通皆真元已脫不可治也脉弦大者易

治沉細者難痊

治驗

一人病四肢皆腫氣促食則脹悶止喫稀粥余令  
日服金液丹百粒至四日覺大便滑再二日乃令  
喫麪食亦不妨蓋治之早也

一婦人病面脚皆腫飲食減少世醫皆作血虛治  
之不效余曰非血病乃脾胃虛也令日服延壽丹

十粒全真丹五十粒至十日覺大便滑病愈

俞翰林母七旬餘平日患咳嗽痰紅常服滋陰涼  
潤之劑秋月忽患水腫喘急難臥日漸腫脹飲食  
少進進則氣急欲死諸醫用藥無效乃延予治六  
脉弦大而急按之益勁而空予曰此三焦火氣虛

備不能歸根而浮于外水隨氣奔致玄郭郭而溢  
皮腠必須重溫以化否則不救彼云吾素內熱不  
服溫補片薑入口痰即帶紅先生所論故是第恐  
熱藥不相宜也予曰有是病服是藥成見難執且  
六脈緊大陽已無根無根即脫矣此皆平日久服  
寒涼所致若再捨溫補不用恐無生理請辭彼云  
但三不迫動血證敢不從命子以附桂薑黃十味入  
參三錢不三劑而愈痰喘不吐紅舊證竟不發矣  
又二劑而全愈痰喘不吐紅舊證竟不發矣  
一婦因子遠出饑飢不給憂愁成病變為水腫喘  
急粥飲不入者月餘矣友人見予談及此婦乃謂  
子口皆做一好事予曰既云好事焉敢違命遂  
借往診見其六脈欲絕臍突腰圍喘難着席脾腎  
之脈不可為矣因處十味方命服四劑喘微定而  
腫漸消覺思飲食復診其脈微有起色又四劑而  
腫消食進矣嗟嗟若棄而不治雖不由我而死而  
實我殺之也  
友亦大快

膨脹

此病之源與水腫同皆因脾氣虛衰而致或因他病  
攻損胃氣致難運化而腫大如鼓也病本易治皆由  
方書多用利藥病人又喜于速效以致輕者變重重  
者變危甚致害人黃帝正法先灸命關百壯固住脾  
氣灸至五十壯便覺小便長氣下降再灸關元三百  
壯以保腎氣五日內便安服金液丹草神丹減後止  
許喫白粥或羊肉汁泡蒸餅食之瘥後常服全真丹  
來復丹凡臃脹脈弦緊易治沉細難痊此病若帶四  
肢腫者溫之  
于早尚可奏功若單腹脹而更青筋浮露者難治苟  
能看破一切視世事如浮雲置此身于度外方保無  
虞次則慎起居節飲食遠房帷戒情性重溫急補  
十中可救二三先生之丹艾用之得宜其庶幾乎

治驗

一人因飲冷酒喫生菜成泄瀉服寒涼藥反傷脾氣致腹脹命灸關元三百壯當日小便長有下氣又服保元丹半斤十日即愈再服全真丹永不發矣

暴注

凡人腹下有水聲當即服丹藥不然變脾泄害人最速暴注之病由暑月食生冷太過損其脾氣故暴注下泄不早治三五日瀉脫元氣方書多作尋常治之河間又以為火用涼藥每害人性命治法當服金液

丹草神丹霹靂湯薑附湯皆可若危篤者灸命關二

百壯可保若灸遲則腸開洞泄而死

脾泄之病世人輕忽時醫亦邈

視之而不知傷人最速鹽商薛汝良午間注泄晡時即厥冷不禁及余診示已黃昏矣兩手脈皆絕予曰病已失守不可為矣速灸關元重投參附竟不能救先生之論誠非謬也

治驗

一人患暴注因憂思傷脾也服金液丹霹靂湯不効蓋傷之深耳灸命關二百壯小便始長服草神丹而愈

休息痢

痢因暑月食冷及濕熱太過損傷脾胃而致若傷氣

則成白痢服如聖餅全真丹金液丹亦可若傷血則成赤痢服阿膠丸黃芩芍藥湯初起腹痛者亦服如聖餅不積血而愈此其輕者也若下五色魚腦延綿日久飲食不進者此休息痢也最重不早治十日半月害人性命治法先灸命關二百壯服草神丹霹靂湯三日便愈過服寒涼下藥必死非病至休息無已者理之誤或飲食之過所以止作頻仍延綿不已然欲使其竟止亦頗費手有肺氣虛陷者有腎陰不足者有脾腎兩虧者有經脈內陷者有肝木乘脾者有腐穢不清者有固泄太早者有三焦失運者有濕熱傷脾者有生陽不足者有孤陰注下者有暑毒未清者有陰積腸蠱者有風邪陷入者一一體察得其病情能感手取效

治驗

一人病休息痢已半年元氣將脫六脉將絕十分危篤余為灸命關三百壯關元三百壯六脉已平痢已止兩脇刺痛再服草神丹霹靂湯方愈一月後大便二日一次矣  
一人病休息痢余令灸命關二百壯病愈二日變注下一時五七次令服霹靂湯二服立止後四肢浮腫乃脾虛欲成水脹也又灸關元二百壯服金液丹十兩一月而愈

內傷

由飲食失節損其脾氣輕則頭暈發熱四肢無力不思飲食脉沉而緊服來復全真及平胃散重者六脉浮緊頭痛發熱吐逆心下痞服葶藶散來復全真而愈若被庸醫轉下涼藥重損脾氣變生他病成虛勞臃脹泄瀉等證急灸中脘五十壯關元百壯可保全生若服涼藥速死內傷之證飲食其一端也又有惡怒奇愁皆由七情不以次入直傷五藏更有由房室跌撲而成內傷者臨證之工不可不察

霍亂

霍亂由于外感風寒內傷生冷致陰陽交錯變成吐瀉初起服珍珠散二錢即愈或金液丹百粒亦愈如

寒氣入腹搏于筋脉致筋抽轉即以瓦片燒熱紙裹烙筋轉處立愈若吐瀉後胃氣大損六脉沉細四肢厥冷乃真陽欲脫灸中脘五十壯關元三百壯六脉復生不灸則死也霍亂之證三焦失運中土受傷一頃劇不寧大法温其三焦調其中土一劑可愈至若厥冷無脉非重用温補不可否則轉筋入腹而死近世時醫不云中暑即言痲發禁用官料競事涼冰刺其廉英針其曲澤以大泄其血不知脾胃受傷中焦之榮血已竭而復大泄之譬下井而投以石也此種醫人不顧人命真狠心虎腹人耶存救人之心者當須體察

暑月傷食泄瀉

凡暑月飲食生冷太過傷人六府傷胃則注下暴泄

傷脾則滑泄米穀不化傷大腸則瀉白腸中痛皆宜服金液丹霹靂湯三日而愈不愈則成脾泄急灸神闕百壯神闕恐是命關之誤難經雖言五泄不傳治法凡一應泄瀉皆依此法治之

治驗

一女人因泄瀉發狂言六脉緊數乃胃中積熱也詢其丈夫因喫胡椒生薑太多以致泄瀉五日後發狂言令服黃芩知母湯而愈平日恣啖炙煇喜食椒薑胃中積熱者有此一證臨證自明然亦希遇更有瀉脫津液致舌胎乾燥發熱神昏譫妄不寧者此脾腎大虛法當溫補若用寒涼虛脫立見

痢疾

凡人多食生冷濕熱傷其脾胃致成痢疾初起服如聖餅子下積而愈若無大便止下赤膿者乃胃有大熱傷血也宜當歸芍藥湯阿膠湯若下白膿者乃飲食冷物傷大腸也服桃花湯全真丹而愈若腹痛發熱昏睡六脉洪數純泄赤膿乃熱氣滯于腸胃也名疳蠱痢亦有錯服熱藥而得者服黃連丸甚者大通散痢疾固當化積清熱香連承氣等方用果得宜何嘗不應手而愈若涉脾胃虛寒經脉內陷三焦失運而致者又不可不以溫補為要也蓋熱藥之誤易于轉手涼藥之誤救治殊難虛衷以應臨證誤人自

傷脾發潮熱

此因飲食失節損及脾胃致元氣虛脫令頭昏脚弱四肢倦怠心下痞悶午後發熱乃元氣下入陰分也服全真丹葦澄茄散三月而愈若服滋陰降火涼藥其病轉甚若俗醫用下藥致病危篤六脉沉細灸中脘五十壯關元一百壯可保遲則脾氣衰脫而死庸醫

于此證不知誤殺天下多少蒼生而小兒為更甚午後發熱不日潮熱便云陰虛心下痞悶不云食積便云停痰動輒寒涼恣行消克大人變為虛脫小兒轉為脾風而猶曰風暑難清痰熱為害及至垂斃醫者云人力已竭病家云天數難挽至死不悟良可悲哉

嘔吐反胃

凡飲食失節冷物傷脾胃雖納受而脾不能運故作吐宜二聖散草神丹或金液丹若傷之最重再兼六慾七情有損者則飲蓄于中焦令人朝食暮吐名曰番胃乃脾氣太虛不能健運也治遲則傷人若用攻尅重傷元氣立死須灸左命關二百壯服草神丹而愈若服他藥則不救嘔吐一證先當審其所因輕者虛者六君理中亦易為力唯重者一時暴吐厥逆汗出稍失提防躁脫而死不可不知至于番胃雖屬緩證治以丹艾庶可獲全不然生者少矣

痞悶

凡飲食冷物太過脾胃被傷則心下作痞此為易治



宜全真丹一服全好大抵傷胃則胸滿傷脾則腹脹  
腹脹者易治宜草神丹金液全真來復等皆可服寒  
甚者薑附湯此證庸醫多用下藥致一時變生腹大  
水腫急灸命關二百壯以保性命遲則難救此證乃  
謂陽畜積病死之證不可以誤治也若腹脹  
所謂藏寒生滿病是也苟不重溫危亡立至

治驗

一人因暑月食冷物以致胸腹脹悶欲死服金液  
丹百丸少頃加全真丹百丸即有氣下降而愈夏  
月

伏陰在內一切冷物在所禁食若不  
慎而致傷者不重劑溫化惡得不變

一小兒食生杏致傷脾脹悶欲死灸左命關二十

壯即愈又服全真丹五十丸生杏在大人尚不可  
食况小兒乎溫中藥

內入些少  
麝香為妙

一人每飯後飲酒傷其肺氣致胸膈作脹氣促欲

死服鍾乳粉五膈散而愈若重者灸中府穴亦好

服涼藥則成中滿難治矣酒後啣飯中氣不傷若  
飯後飲酒清氣濁亂所

以致  
脹

一人情懶飲食即臥致宿食結于中焦不能飲食

四肢倦怠令灸中脘五十壯服分氣丸丁香丸即

愈修養書云飯後徐徐行百步自然食毒自消  
磨食後即臥食填中宮升降有乖焉得不病

中暑

凡此病脉大而緩其候飲食不減起居如常但時發  
 煩熱渴飲無度此暑證也易治知母散一服便愈若  
 煩熱困倦不食者暑氣傷胃也服温中湯藥即愈若  
 服香薷六一寒涼等劑冰損胃氣多致變瘡痢泄瀉  
 諸證慎之若暑氣客于心包絡之經令人譫言煩渴  
 欲飲冷水小便秘澀大便下赤水當服阿膠丸當歸  
 芍藥湯而愈若暑月飲食冷物寒邪入客胃中致腹  
 中作痛宜金液草神全真來復等丹連二服便愈若  
 以涼藥下之變為中滿脾泄若元氣虛早間行路冷  
 氣入腹令人心肚作痛宜服金液丹或來復丹凡暑

月人多食冷物若常服金液全真來復保元等丹自  
 然脾胃調和飲食不傷但少壯人須五日一次恐熱  
 上攻眼目也中暑之證原只尋常荷渴飲無度知母  
散可一服若困倦不食便當温中設暑  
客于心包絡譫煩飲冷溺澀便赤清心涼血皆一劑  
可愈者若今之醫家將一切內傷虛寒之證亦認為  
暑恣用寒涼朝夕靡已及變陰深冷脫猶云暑邪內  
攻病勢深重難挽回矣間遇明眼高手投以參附猶  
且從中阻撓洎投投之有効輒視顏支飾一肩卸却罪歸  
不謂渠意亦同投投之不効讒言鋒起一肩卸却罪歸  
參附病家本不識病情未免隨之怨悵嗟嗟此種醫  
人天良盡喪予具熱腸常遭此輩謗累因書此以志  
慨

暑月脾燥病

凡夏月冷物傷脾又兼暑氣客之則成燥病令人發

熱作渴不止六脉弦大乃火熱傷肺而津液不能上  
輸也有脾胃之分若發燥熱而能食者熱在胃也易  
治服全真丹華澄茄散而愈若發燥熱不進飲食四  
肢倦怠熱在脾也為重服金液草神或來復等丹五  
日而愈如作暑治下以涼藥熱雖暫退必變為中滿  
洞泄諸證暑月發熱務分虛實六脉沉數飲食如常  
者為實熱服薄荷煎而愈若六脉弦緊減食倦怠者  
為虛熱大忌寒涼宜全真來復等丹而愈夏月發熱  
作渴脉弦  
而大誰肯不作暑治而不用寒涼者不知暑熱薰蒸  
耗人元氣元氣既傷未有不渴冷物傷脾有垂輸  
三焦失運腠理不和發熱作渴自所不免且六脉  
大弦則為減大則為虛體驗果真一溫可解今之醫  
家專尚香薷青蒿黃連滑石等劑變為瀉泄猶云協  
熱及至虛脫全然不覺此由脉理未明誤作賊之  
也

凡夏月陰氣在腹又暑能傷人元氣更兼冰水冷物  
損其脾胃皆不足證也局方俱用香薷飲白虎益元  
黃連解毒等劑重傷元氣輕則變瘧痢霍亂泄瀉等  
證重則成虛勞中滿注瀉等證余常以保元來復全  
真金液延壽薑附湯等類治暑百發百中好生之士  
請嘗試之

兩脇連心痛

此證由憂思惱怒飲食生冷醉飽入房損其脾氣又

傷肝氣故兩脇作痛庸醫再用寒涼藥重傷其脾致  
 變大病成中滿番胃而死或因惱怒傷肝又加青陳  
 皮枳壳實等重削其肝致令四肢羸瘦不進飲食而  
 死治之正法若重者六脉微弱羸瘦少飲食此脾氣  
 將脫急灸左命關二百壯固住脾氣則不死後服金  
 液全真來復等丹及葶澄茄散隨證用之自愈此證古法  
 在左為肝木為病瘀血不消惱怒所傷在右則為痰  
 為飲為食積氣滯此皆標病易于治療若宗氣行非  
 虛里作為楚榮氣失調脾絡作痛此非積漸溫養不愈  
 至若兩脅連心痛如刀刺此三陰受煩逆于膈育之  
 間非重用溫補不可又肥氣息貴此積在藏  
 之募原若泥古方端于剝削未有不死者也

消渴

此病由心肺氣虛多食生冷冰脫肺氣或色慾過  
 重傷於腎致津不得上榮而成消渴蓋腎脉貫咽喉  
 係舌本若腎水枯涸不能上榮于口令人多飲而小  
 便反少方書作熱治之損其腎元誤人甚多正書春  
 灸氣海三百壯秋灸關元二百壯日服延壽丹十九  
 二月之後腎氣復生若服降火藥暫時有效日久肺  
 氣漸損腎氣漸衰變成虛勞而死矣此證大忌酒色  
 生冷硬物若脾氣有餘腎氣不足則成消中病脾實  
 有火故善食而消腎氣不足故下部少力或小便如  
 疝孫思邈作三焦積熱而用涼藥損人不少蓋脾雖

有熱而涼藥瀉之熱未去而脾先傷敗正法先灸關

元二百壯服金液丹一斤而愈消渴雖有上中下之分總由乎損耗津液

所致蓋腎為津液之原脾為津液之本木原虧而消渴之證從此致矣上消者素問謂之高消渴而多飲小便頻數中消者素問謂之中消穀善飢身體消瘦下消者素問謂之肺消渴而便數有膏飲一溲

後人又謂之腎消腎消之證則已重矣若脈微而瀉或細小身體瘦痺弱出味甘者皆不治之證也大法

以救津液壯水火為生

治驗

一人頻飲水而渴不止余曰君病是消渴也乃脾

肺氣虛非內熱也其人曰前服涼藥六劑熱雖退

而渴不止覺胸脇氣痞而喘余曰前證止傷脾肺

因涼藥復損元氣故不能健運而水停心下也急

灸關元氣海各三百壯服四神丹六十日津液復

生方書皆作三焦猛熱下以涼藥殺人甚于刀劍

慎之津液受傷不惟消渴亦兼雜病而誤用寒涼者不少時醫以此殺人而人不悟奈何

着惱病

此證方書多不載人莫能辨或先富後貧先貴後賤

及暴憂暴怒皆傷人五藏多思則傷脾多憂則傷肺

多怒則傷肝多欲則傷心至于憂時加食則傷胃方

書雖載內因不立方法後人遇此皆如虛證治之損

人性命其證若傷肝脾則泄瀉不止傷胃則昏不省

痛鴉心書 卷中 庚

人事傷腎則成癆瘵傷肝則失血筋攣傷肺則咯血吐痰傷心則顛冒當先服薑附湯以散邪後服金液丹以保脾胃再詳其證而灸之若脾虛灸中府穴各二百壯腎虛灸關元穴三百壯二經若實自然不死後服延壽丹或多服金液丹而愈涼藥服多重損元氣則死此證皆因七情所傷五志之過審其所因而調治之庶無失誤

治驗

一人年十五因大憂大惱却轉脾虛庸醫用五苓散及青皮枳殼等藥遂致飲食不進胸中作悶余令灸命關二百壯飲食漸進灸關元五百壯服薑

附湯一二劑金液丹二斤方愈方書混作勞損用

溫平小藥誤人不少悲夫大憂惱而得脾泄醫用此近有六脈虛脫脾腎敗壞猶云不妨而用此藥者又庸醫中之斷隸也

頭暈

此證因冷痰聚于腦又感風寒故積而不散令人頭旋眼暈嘔吐痰涎老年人宜服附子半夏湯少壯人宜服半夏生薑湯若用涼劑則暫時有效痰愈凝而愈固難以速效矣此即所謂頭風證故有冷痰聚于腦又感風寒之說若頭暈則純屬于虛蓋肝虛則血不上榮肺虛則清陽不運腎虛則厥成巔疾心虛則火炎浮越夫風虛痰火間或有之至于頭風虛證不可不知

治驗

一人頭風發則旋暈嘔吐數日不食余為針風府穴向左耳入三寸去來留十三呼病人頭內覺麻熱方令吸氣出針服附子半夏湯永不發華陀針曹操頭風亦針此穴立愈但此穴入針人即昏倒其法向左耳橫下針則不傷大筋而無暈乃千金妙法也此針法奇妙須與高手針家議之方得無誤  
一人起居如常但時發頭痛此宿食在胃脘也服丁香丸十粒而愈

厥證

素問云五絡俱絕形無所知其狀若尸名為尸厥由憂思驚恐致胃氣虛閉于中焦不得上升下降故昏冒強直當灸中脘五十壯即愈此證婦人多有之小兒急慢驚風亦是此證用藥無效若用吐痰下痰藥即死惟灸此穴可保無虞令服來復丹葶藶散而愈厥證經言詳矣尸厥不過厥證之一端外有血厥痰厥煎厥薄厥總皆根氣下虛之證所謂少陰不至者厥也又云內奪而厥則為瘖瘖此腎虛也

治驗

一婦人產後發昏二目滯澁面上發麻牙關緊急二手拘攣余曰此胃氣閉也胃脉挾口環唇出于

齒縫故見此證令灸中脘穴五十壯即日而愈後產

血厥倉公  
白微散

一婦人時時死去已二日矣凡醫作風治之不効  
灸中脘五十壯即愈

氣脫

少年酒色太過脾腎氣虛忽然脫氣而死急灸關元  
五百壯服霹靂湯薑附湯金液丹久而愈此證須  
早治遲則元氣亦脫灸亦無及矣更有血脫神脫精  
脫津脫液脫若汗

脫即津  
液脫也

死脉見

此由少年七情六慾所損故致晚年真氣虛衰死脉  
見于兩手或十動一止或二十動一止皆不出三年  
而死又若屋漏雀喙之類皆是死脉灸關元五百壯  
服延壽丹保元丹六十日後死脉方隱此仙師不傳  
之妙法也雍正三年初冬一董姓者來求診脉其脉  
或二動一止或七動一止或十二動或十  
七動一止此心絕脉也仲冬各水旺其何能生始定參  
芪茸附河車脐帶桂心棗仁等方與之服十劑脉之  
歇止參差不似前之有定數矣又十劑而歇止少矣  
又十劑六脉如常矣噫不可謂藥之無功也且知治  
早雖不用丹艾  
亦有可生全者

腰痛

老年腎氣衰又兼風寒客之腰髓髀作痛醫作風痺



走痛治用宣風散趁痛丸重竭真氣誤入甚多正法  
服薑附湯散寒邪或全真丹灸關元百壯則腎自堅  
牢永不作痛須服金液丹以壯元陽至老年不發  
腰痛而作風氣痺證治者多致大  
害即使風痺重用溫補亦能散去

### 中風人氣虛中滿

此由脾腎虛憊不能運化故心腹脹滿又氣不足故  
行動則胸高而喘切不可服利氣及通快藥令人氣  
愈虛傳為脾病不可救矣宜金液丹全真丹一月方  
愈重者灸命關關元二百壯  
腎虛則生氣之原乏脾  
虛則健運之力微氣虛  
中滿之證作矣又內經謂藏寒生滿病醫  
人知此不行剗劑重劑溫補為變者少矣

### 老人兩脇痛

此由胃氣虛積而不通故脇下脹悶切不可認為肝  
氣服削肝寒涼之藥以速其斃服草神金液十日重  
者灸左食竇穴一灸便下有下氣而愈再灸關元百壯

更佳  
老人與病後及體虛人兩脇作痛總宜以調  
理肝脾更須察其兼證有無虛實治頗不易

### 治驗

一人脾氣虛好食冷物不消常覺口中出敗卵臭

服草神丹即愈若服全真金液亦効  
脾胃既為食  
所傷不可再

施消尅唯治以溫  
化則自健運矣

一人脾氣虛致積氣留于脇下兩肋常如流水多

服草神丹而愈脾虛致積當用温行水流脇下更仗温化

疝氣

由於腎氣虛寒凝積下焦服草神丹灸氣海穴自愈

此證內經論五臟皆有而後人以病由于肝先生言因腎氣虛寒總不若丹艾之妙

吞酸

凡人至中年脾氣虛弱又傷生冷硬物不能運行蘊

積中焦久之變為鬱火停痰故令噫氣久則成中滿

腹脹之證須服草神丹全真丹金液丹皆可吞酸為病雖微

致害非淺苟不慎節飲食成謹房帷久久無不變成臃脹

脾瘧

凡瘧病由于暑月多吃冰水冷物傷其脾胃久而生

痰古今議論皆差或指暑邪或分六經或云邪祟皆

謬說也但有脾胃之分胃瘧易治脾瘧難調或初

起一日一發或間日一發乃陽明證也清脾飲截瘧

丹皆可若二三日一發或午後發綿延不止者乃脾

瘧也此證若作尋常治之誤人不少正法當服全真

草神四神等丹若困重日久肌膚漸瘦飲食減少此

為最重可灸左命關百壯自愈窮人艱于服藥只灸

命關亦可愈凡久瘧止灸命關下火便愈實秘法也

脾瘧原屬正虛治得其法應手即愈而世人競尚柴胡攻多補少不知元氣既虛又按其本以致耽延時

日變端百出先生  
灸法實可宗至

治驗

一人病瘧月餘發熱未退一醫與白虎湯熱愈甚  
余曰公病脾氣大虛而服寒涼恐傷脾胃病人云  
不服涼藥熱何時得退余曰內經云瘧之始發其  
寒也烈火不能止其熱也冰水不能遏當是時良  
工不能措其手且扶元氣待其自衰公元氣大虛  
服涼劑退火吾恐熱未去而元氣脫矣因為之灸  
命關纔五七壯脇中有氣下降三十壯全愈久瘧而用  
白虎真所謂育人說暗話也繆仲醇一代名醫論  
多出此竊所未解予觀廣筆記疑其所學全無巴

鼻至于本草經疏設立許多禁忌令  
後人疑信相半不敢輕用為患匪細

胃瘧

素問論瘧而無治法千金雖傳治法試之無效凡人  
暑月過啖冷物輕則傷胃重則傷脾若初起先寒後  
熱一日一發乃胃瘧也易治或吐或下不過十日而  
愈扁鵲正法服四神丹甚者灸中脘穴三十壯愈此  
感淺病輕人多忽畧雜正三年秋冬之交人皆病此  
重劑溫補或可幸免投藥少差立見冰脫用清解小  
柴胡者皆不能起寧絡之人死者比比以  
其溺用寒涼雖一誤再誤而終不悟也

邪祟

此證皆由元氣虛弱或下元虛憊憂恐太過損傷心

氣致鬼邪乘虛而入令人昏迷與鬼交通當服睡聖散灸巨闕穴二百壯鬼氣自滅服薑附湯而愈邪崇  
着人人自着之耳果立身正直心地光明不負君親  
無漸屋漏鬼神欽敬不違何邪崇之敢乘哉惟其陰  
幽偏頗卑慢昏柔之輩多能感此有似邪崇之附着  
究非邪崇也蓋由人之藏氣受傷而神魂失守故肝  
藏傷則意不寧而白衣人來搏擊心藏傷則神不安  
而黑衣人來毀傷脾藏傷則意有存而青衣人來  
毆辱肺藏傷則魄不守而紅衣人來凌轢腎藏傷則  
志多猶疑而黃衣人來斥辱此皆神氣受傷以致妄  
有聞見不覺其見乎四體發乎語言而若有邪崇所  
附也正法惟有安其神魂定其志魄審其何藏之虛  
而補之何藏之乘而制之可也

治驗

一婦人因心氣不足夜夜有少年人附着其體診

六脉皆無病余令灸上腕穴五十壯至夜鬼來離  
牀五尺不能近服薑附湯鎮心丹五日而愈

一貴人妻爲鬼所着百法不効有一法師書天醫  
符奏玉帝亦不効余令服睡聖散三錢灸巨闕穴  
五十壯又灸石門穴三百壯至二百壯病人開眼  
如故服薑附湯鎮心丹五日而愈

一婦人病虛勞真氣將脫爲鬼所着余用大艾火  
灸關元彼難忍痛乃令服睡聖散三錢復灸至一  
百五十壯而醒又服又灸至三百壯鬼邪去勞病  
亦瘥

怔忡

凡憂思太過，心血耗散，生冷硬物，損傷脾胃，致陰陽不得升降，結于中焦，令人心下恍惚。當以來復丹、金液丹、葶藶散治之。若心血少者，須用獨骸大丹。次則延壽丹亦可。憂思之傷怔忡之本，證飲食之傷怔忡之兼證。微有虛實之殊，審證施治，自然無誤。

心痛

皆由鬱火停痰而作，飲食生冷，填于陽明太陰分野，亦能作病。宜全真丹。若胃口寒甚，全真丹或薑附湯不愈，灸中脘七十壯。若脾心痛發而欲死，六脉尚有

者，急灸左命關五十壯，而甦。內服來復丹、葶藶散。若時痛時止，吐清水者，乃蛔攻心包絡也。服安蟲散。若卒心痛，六脉沉微，汗出不止，爪甲青，足冷過膝，乃真心痛也不治。心為一身之主宰，一毫不可犯處。正無偏，豈宜受病。凡痛非心痛，乃心之包絡痛，與脾痛、胃痛、膈痛、耳審其所以所容或氣或痰，雖有九種之分，虛實之異，大槩虛者為多，屬實者問亦有之，審察而治，庶無差錯。

痺病

風寒濕三氣合而為痺，走注疼痛，或臂腰足膝拘攣，兩肘牽急，乃寒邪湊于分肉之間也。方書謂之白虎歷節風。治法于痛處灸五十壯，自愈。湯藥不効，惟此

法最速若輕者不必灸用草烏末二兩白麩二錢醋  
 調熬成稀糊攤白葛上乘熱貼患處一宿而愈痺者氣血凝閉而不行留滯于五藏之外合而為病又邪入于陰則為痺故凡治痺非溫不可方書皆作實治然屬虛者亦頗不少

神疑病

凡人至中年天數自然虛衰或加妄想憂思或為功名失志以致心血大耗癡醉不治漸致精氣耗盡而  
 尋當灸關元穴三百壯服延壽丹一斤此證尋常藥  
 餌皆不能治惟灸艾及丹藥可保無虞此乃失志之證有似癡呆或如神祟自言自笑神情若失行步若聽非人遂其志不能愈故愈者甚少

治驗

一小兒因觀神戲受驚時時悲啼如醉不食已九  
 十日危甚令灸巨闕五十壯即知人事曰適間心  
 上有如火滾下即好服鎮心丸而愈驚則神無所倚痰涎入客包絡宮城受傷心不安寧故肺氣來乘而虛火上蒸灸法之妙愈于緩驚錠抱龍丸多矣  
 一人功名不遂神思不樂飲食漸少日夜昏默已  
 半年矣諸醫不効此病藥不能治令灸巨闕百壯  
 關元二百壯病減半令服醇酒一日三度一月全  
 安蓋醺酣忘其所慕也失志不遂之病非排遣性酒陶其情此法妙極

下注病

貧賤人久臥濕地寒邪客于腎經又兼下元虛損寒濕下注血脉凝滯兩腿粗腫行步無力漸至大如瓜瓠方書皆以消濕利水治之損人甚多令灸湧泉三里承山各五十壯即愈俗名蘇木腿形狀怪異可畏終身之疾鮮有愈者先生灸

法未知 驗否

脚氣

下元虛損又久立濕地致寒濕之氣客于經脉則雙足腫痛行步少力又暑月冷水濯足亦成乾脚氣發則連足心腿脢腫痛如火烙或發熱惡寒治法灸湧

泉穴則永去病根若不灸多服金液丹亦好平常藥暫時有效不能全除其不能行步者灸關元五十壯大忌涼藥泄傷腎氣變為中滿腹脹而死久患脚氣人濕氣上攻連兩脇腰腹肩臂拘攣疼痛乃腎經濕盛也服宣風丸五十粒微下而愈然審果有是證者可服若虛人斷不可輕用脚氣壅疾言邪氣壅滯于下有如痺證之閉而不行但此證發則上衝心胸嘔吐煩悶甚為危險即內經所謂厥逆是也輕者疏通經脉散寒濕調其陰陽和其血氣亦易于治如蘇梗腹皮木瓜檳榔蒼朮獨活等藥皆可用也其甚者憎寒壯熱氣逆嘔吐筋急入腹悶亂欲絕此邪衝入腹危險更甚非重用温化不可如茱萸薑附等藥宜皆用之至如剝削過度脉微欲絕變成虛寒往不起不可謂壅疾而不利于補也

治驗

一人患脚氣兩骭骨連腰日夜痛不可忍為灸湧

泉穴五十壯服金液丹五日全愈此症有似痛痺

一女人患脚氣忽手足徧身拘攣疼痛六脉沉大

乃胃氣盛也服宣風丸三十粒泄去而愈此證須細審的

確方可用

足痿病

凡腰以下腎氣至之腎虛則下部無力筋骨不用可

服金液丹再灸關元穴則腎氣復長自然能行動矣

若腎氣虛脫雖灸無益此證內經皆言五藏虛熱故後人有補陰虎潛金剛地黃

等丸東垣又作濕熱而以潛行散為治痿妙藥然不可泥也虛寒之證亦頗不少臨證審詳自有分曉

治驗

一老人腰脚痛不能行步令灸關元三百壯更服

金液丹強健如前

黃疸

暑月飲食冷物損傷脾胃至土故見黃色又脾氣

虛脫濁氣停于中焦不得升降故眼目徧身皆黃六

脉沉緊宜服草神丹及金液全真來復之類重者灸

食竇穴百壯大忌寒涼此證第一要審陰陽黃必

渴此皆實證清濕熱利小便可愈若身熱脉浮亦可發表陰黃則身色晦暗神思困倦食少便澹脉來無



力重用溫補則小便長而黃自退若誤作陽黃治之  
為變非細又一種膽黃證因大驚卒恐膽傷而汁泄  
于外為病最重惟覺之早  
而重用溫補者尚可挽回

治驗

一人徧身皆黃小便赤色而澀灸食竇穴五十壯  
服薑附湯全真丹而愈

黑疸

由于脾腎二經縱酒貪色則傷腎寒飲則傷脾故兩  
目徧身皆黃黑色小便赤少時時腸鳴四肢困倦飲  
食減少六脉弦緊乃成腎癆急灸命關三百壯服草  
神丹延壽丹而愈若服涼藥必死

便閉

老人氣虛及婦人產後少血致津液不行不得通流  
故大便常結切忌行藥是重損其陰也止服金液丹  
久久自潤或潤腸丸亦可又大小便至腎腎開竅于  
二陰能運行津液若腎氣虛則二便皆不通亦服金  
液丹腎氣壯則大小便自利矣有陳姓鹽商年七十  
六矣春時患中風脫  
證重劑參附二百餘服獲痊至十月大便秘結不行  
日登廁數十次冷汗大出面青厥一月大便閉結不行  
補劑入生大黃三錢予深以為不可戒之日老年脫  
後幸參附救全不能安養過于思慮以致津液枯竭  
性急以速其變若一氣滋津佐以溫化自然流通何事  
矣姑忍二三日勢當自用參二兩菴蓉一兩當歸五  
之辭至次日不得已用人參二兩菴蓉一兩當歸五

丹鳥小書

卷中

三

錢松柏仁各五錢附子三錢升麻四錢煎服外用線  
礬一斤入圓桶以滾水冲入扶其坐上一刻而通

溺血

凡膏梁人火熱內積又多房勞真水既涸致陰血不  
靜流入膀胱從小便而出可服延壽丹甚者灸關元  
若少壯人只作火熱治之然在因病制宜火熱內積  
實證也一  
劑寒涼可解房勞傳腎虛證也非  
溫補不可審證而治大有分別

淋證

此由房事太過腎氣不足致包絡凝滯不能通行水  
道則成淋也服檳榔湯鹿茸丸而愈若包絡閉澀則  
精結成砂子從莖中出痛不可忍可服保命丹甚者

灸關元淋濁之證古人多用寒濕分清通利之品  
然初起則可久而虛寒又當從溫補一法

腸癖下血

此由飲食失節或大醉大飽致腸胃橫解久之冷積  
結于大腸之間致血不流通隨大便而出病雖尋常  
然有終身不愈者庸醫皆用涼藥止血故連綿不已  
蓋血愈止愈凝非草木所能治也正法先灸神闕穴  
百壯服金液丹十兩日久下白膿乃病根除也經云  
陰絡  
傷則血內溢血內溢則後血治此之法總在別其脈  
之強弱色之鮮闇該清該溫愈亦不難若不慎飲食  
恣縱酒色斷不能愈矣



所見不一。理涕泣而道之。而醫者與病家無一能聽從者。豈非所謂命哉。夫大寒之藥亦能殺人。其勢必緩。猶為可救。不若大熱之藥。斷斷不可救也。至于極輕淡之藥。誤用亦能殺人。此乃其人之本領甚薄。或勢已危殆。故小誤卽能生變。此又不可全歸咎于醫殺之也。

